

Katersugaasiveqarnek pillugu Inatsisartut peqqussutaat nr. 6, 30. oktober 1998-imeersoq Atuussimasoq (Historisk)

Kalaallit Nunaanni katersugaasiveqarnek pillugu inatsimmi nr. 610-mi 23. december 1980-imeersumi § 2 tunngavigalugu makku aalajangersarneqarput:

Kapitali 1.

Siunertaa il.il.

§ 1. Kalaallit Nunaata piorsarsimassutsikkut kingornussaasa tammatsaalineqarnissaat Kalaallit Nunaannilu katersugaasiveqarnikkut sulinerup suleqatigiinnerullu siuarsarneqarnissaa peqqussutikkut matumuuna siunertarineqarpoq.

Imm. 2. Kalaallit Nunaanni katersugaasiveqarnermut ilaappuut Nunatta Katersugaasivia Allagaateqarfialu, katersugaasiviit akuerisaasut, tak. kapitali 3, aamma Katersugaasiveqarnermut Ataatsimititaliaq.

§ 2. Nalunaarsuineq, katersuineq, toqqortarinnineq, paasiniaaneq paasisanillu ingerlatseqqittarneq aqutigalugit katersugaasiviit suliassaraat:

- 1) Kalaallit Nunaata piorsarsimassutsikkut kingornussarsiaasa tammatsaalineqarnissaat sulissutigissallugu
- 2) Kalaallit Nunaata piorsarsimassutsikkut pinngortitamullu tunngasutigut oqaluttuarisaanera paasiniassallugu
- 3) katersugaatit tamanut takusassiarissallugit, aamma
- 4) katersugaatit ilisimatusarnermi atugassanngortissallugit, ilisimatusarnermilu paasisanit ilisimasat siammartissallugit.

Imm. 2. Ataatsimoortumik suliassaqrfinni katersugaasiviit suleqatigiissapput, suliassat imm. 1-imi taaneqartut isumagineqarnerisa siuarsarneqarnissaat siunertaralugu.

Imm. 3. Oqartussat eqqissisimatitsinermik sanaartugassanik pilersaarusionermik suliaqartut katersugaasiviit akisussaaffeqarfimmini killissarititaasut iluanni suleqatigissavaat.

Kapitali 2.

Nunatta Katersugaasivia Allagaateqarfialu

§ 3. Nunatta Katersugaasivia Allagaateqarfialu Namminersornerullutik Oqartussat pilersippaat ingerlanneqarneranullu akisussaallutik.

Imm. 2. Nunatta Katersugaasivia Allagaateqarfialu pisortamit Naalakkersuisunit atorfinitsinneqartumit siulersorneqassaaq.

§ 4. Suliassat § 2 imm. 1-imi taaneqartut suliassallu inatsisit allat tunngavigalugit suliassiissutigineqartut Nunatta Katersugaasiviata Allagaateqarfiatalu sularissavai.

Imm. 2. Ukiuni sisamani sulinissamut pilersarusiaq Nunatta Katersugaasiviata Allagaateqarfiatalu sularisassavaa, ilisimatitsissutitullu Naalakkersuisunut taanna nassiuttassallugu.

Imm. 3. Nunatta Katersugaasivia Allagaateqarfialu sulinini pillugu ukiumoortumik nalunaarusiortassaaq, taannalu Naalakkersuisunut akuerisassangorlugu Katersugaasiveqarnermullu Ataatsimiititaliamut ilisimatitsissutit nassiunneqartassalluni.

§ 5. Qangarsuarnitsat ilisimaneqartut tamaasa inatsisartut peqqussutaanni pineqartunut ilaatinneqartut aamma nassaat § 27 tunngavigalugu immikkut ittumik soqutiginaateqartut nalilerneqartut Nunatta Katersugaasiviata Allagaateqarfiatalu nalunaarsussavai.

§ 6. Katersugaatit takussutissat eqqortumik takutitsisuuniartussat Nunatta Katersugaasivia Allagaateqarfiatalu katersussavai, katersugaatinut ilanngutissavai tammatssallugillu.

Imm. 2. Pigisat ataasiakkaat imaluunniit katersugaatit ilaat katersugaasivinni kapitali 3 tunngavigalugu akuerisaasuni uninngasuutigineqarsinnaapput. Pigisat uninngasuutigineqartut Katersugaasivimmuut sukkulluunniit uterteqquneqarsinnaapput.

Imm. 3. Pisut immikkut ittut ilaanni pisortap inassuteqarneratigut Naalakkersuisullu akuersissuteqarnerisigut Nunatta Katersugaasiviata Allagaateqarfiatalu katersugaatit ilaat katersugaatinit immikkoortissinnaavai.

Imm. 4. Pigisat ilaat katersugaatinit immikkoortinneqartut katersugaasivinnut akuerineqarsimasunuinnaq tunniunneqarsinnaapput. Pigisat pigisalluunniit pineqartut katersugaasiviit arlaannaannilluunniit tigujumaneqanngippata immikkoortinneqartut allanut tunniunneqarnissaat kasiilerneqarneqarnissaalluunniit Naalakkersuisut akuersissutigisinnaavaat.

§ 7. Piorsarsimassutsikkut oqaluttuarisaaneq pillugu ilisimatusarneq Nunatta Katersugaasiviata Allagaateqarfiatalu ingerlatissavaa, matumani Kalaallit Nunaanni illukunik il.il. assaalluni misissuinerit ilanngullugit eqqarsaatigalugit, paasisanillu ingerlatseqqittarneq aqutigalugu kalaallit piorsarsimassutsikkut kingornussarsiaannik Kalaallillu Nunaata piorsarsimassuseqarnikkut ineriartorneranut ilisimasat siaruartereqataaffigalugit.

§ 8. Katersugaatit Nunatta Katersugaasiviata Allagaateqarfiatalu ilisimatusarnermut atugassangortissavai. Tassunga atatillugu aningaasartuutit, katersugaatinik atuerusuttunit akilerneqassapput.

Imm. 2. Katersugaatit piffissani siumut aalajangerneqareersimasuni tamanit takuneqarsinnaatinneqassapput.

Imm. 3. Ilinniagaqarfiit atuartsinermut ilagitillugu katersugaasivinnut takusaatitsisut akiliuteqartinneqarnissaat piumasarineqarsinnaanngilaq.

§ 9. Nunatta Katersugaasiviata Allagaateqarfiatalu katersugaasiviit akuerisaasut suliassani katersugaasivinnut tunngasuni siunnersortassavai.

Imm. 2. Suliat teknikkikkullu periarfissat tamanna ajornartinnikkaangassuk Nunatta Katersugaasivia Allagaateqarfialu katersugaasiviit akuerisaasut pigisaannik immikkut aanaveersaanermik ingerlataqartassaaq. Tamatumunnga aningaasartuutit katersugaasivinnit pineqartunit

akilerneqartassapput.

Imm. 3. Nunatta Katersugaasiviata Allagaateqarfiatalu katersugaasivinnut akuerisaasunut pisussaaffii pillugit malittarisassat erseqqinnerusut Naalackersuisut aalajangersarsinnaavaat, tamatumunnga ilanngullugit siunnersorneqarnermut tunngatillugu aningaasartuutit akilerneqarnerat pillugu.

§ 10. Katersugaasiviit akuerisaasut katersugaataasa toqqortarineqarnerat Nunatta Katersugaasiviata Allagaateqarfiatalu nakkutigissavaa.

§ 11. Nunatta Katersugaasivia Allagaateqarfialu nunat tamat katersugaasiveqarnikkut suleqatigiinneranni Kalaallit Nunaanni katersugaasiviit sinnerlugit peqataasassaaq.

Imm. 2. Piorsarsimassutsikkut oqaluttuarisaanermi qangarsuarnitsat Danmarkimut nunanulluunniit allanut anninneqarsimasut utertinneqarnissaat pillugu Nunatta Katersugaasivia Allagaateqarfialu Kalaallit Nunaanni katersugaasiviit sinnerlugit isumaqatigiinniuteqartuusassaaq.

Kapitali 3.

Katersugaasiviit akuerisaasut

§ 12. Katersugaasiveqarnermut Ataatsimiititaliap akuersissuteqareerneratigut suliat § 2 imm. 1-mi erseqqinnerusumik taaneqartut nunap ilaani aalajangersimasumi sammisassanulluunniit aalajangersimasunut tunngasuni suliaasat katersugaasiviup aalajangersimasup suliarissagai Naalackersuisut akuersissutigisinnaavaat.

Imm. 2. Katersugaasiviup akuerisaasup sulineranut piorsarsimassuseqarnikkut siammarterisumik suliniuteqarnerit ilaatinneqarsinnaapput, matumani katersugaasiviup suliffeqarfinnik piorsarsimassuseqarnikkut siammarterinermik suliniuteqartunik suleqateqarsinnaanera ilanngullugu eqqarsaatigalugu.

§ 13. § 12 tunngavigalugu akuerineqassagaanni piumasaqaatit makku eqqortinneqarsimasariaqarput:

- 1) Katersugaasivik kommunimit kommunilluunniit suleqatigiiffianit pigineqassaaq, imminut pigisuulluni imaluunniit peqatigiiffimmit katersugaasiviup ingerlanneqarnissaanik siunertaqartumit pigineqassalluni.
- 2) Kalaallit Nunaata piorsarsimassutsikkut kingornussarsiaasa ilaat erseqqinnerusumik allaaserineqarsimasut katersugaasiviup akisussaaffigissavai, katersugaasiviilluunniit suliaasaattut taaneqarsimasut allat akisussaaffigissallugit.
- 3) Katersugaasivimmu ileqqoreqqusat katersugaasiviup aqqa, piginituussutsinut tunngasut, siunertaa, akisussaaffeqarfii, siulersuisuisa katitigaanerat, siulersuisuinik qinersisarneq, initai, missingersuutai, naatsorsuutai, kukkunersiuisarneq, ileqqoreqqusat allanngortinneqarnissaannut periarfissat atorunnaarsinneqassappallu qanoq iliortoqarnissaa pillugit aalajangersakkanik imaqqassapput.
- 4) Katersugaasivik naammaginartumik pitsaassuseqassaaq, katersugaasiviup katersugaataasa illersorneqarsinnaasumik toqqortarinneqarnissaannik qulakkeerisumik, aningaasatigullu tunngavissaqassalluni pitsaassutsip ataavartinneqarnissaanut periarfissiisumik.
- 5) Katersugaasiviup pisortaa katersugaasivimmi sulinermik ilinniagaqarsimasuusaaq, katersugaasivimmilluunniit siulersuineramik ingerlatsinissamut allatigut piukkunnaateqartuusalluni.

6)Katersugaatit piffissani siumut aalajangereersimasuni tamanit takusarneqarsinnaatinnegassapput, katersugaasivillu ilinniarfinnut atuartitsinermut atatillugu takusaatitsisunut akiliisitsinani isertitsisassalluni.

§ 14. Ukiuni sisamani sulinissamut pilersaarussiaq katersugaasiviup suliarisassavaa, taannalu kommunimut ingerlatsisuusumut tapiissuteqartartumulluunniit Nunatta Katersugaasivianut Allagaateqarfianullu Katersugaasiveqarnermullu Ataatsimiititaliamut ilisimatitsissutitut nassiunneqartassalluni.

Imm. 2. Katersugaasivik ukiumoortumik naatsorsuusiortassaaq, missingersuusiortassalluni katersugaasivittullu sulinini pillugu nalunaarusiortassalluni, taannalu kommunimut ingerlatsisuusumut tapiissuteqartartumulluunniit akuerisassanngortittassallugu. Katersugaasivik kommunimit taaffigineqartanngippat, naatsorsuutit, missingersuutit, katersugaasiviullu sulinini pillugu nalunaarusiaa katersugaasiviup malittarisassai malillugit, tak. § 13, nr. 3, akuerineqassapput.

Imm. 3. Katersugaasiup ukiumoortumik naatsorssutai, missingersuutai, katersugaasiviullu sulinini pillugu nalunaarusiaa, tak. imm. 2, Naalakkersuisunut, Nunatta Katersugaasivianut Allagaateqarfianullu kiisalu Katersugaasiveqarnermut Ataatsimiititaliamut ilisimatitsissutitut nassiunneqartassalluni.

§ 15. Nassaat kapitali 5-imi pineqartunut ilaatinneqartut katersugaasivinnit akuerisaasunit Nunatta Katersugaasivianut Allagaateqarfianullu nalunaarutigineqartassapput.

§ 16. Katersugaasiviup katersugaataasa ilaat taamaallaat katersugaasivinnut akuerisaasunut allanut imaluunniit Nunatta Katersugaasivianut Allagaateqarfianullu tunniunneqarsinnaapput uninngasuutigittinneqarsinnaallutilluunniit. Pigisaq pigisalluunniit pineqartut katersugaasiviit arlaannaanilluunniit tigunganeqanngippata immikkoortinneqartut allanut tunniunneqarsinnaapput kasiilerneqarsinnaallutilluunniit.

§ 17. Katersugaasiviup § 13-imi piunasaqaataasut eqqortikkunnaarpagit imaluunniit §§ 14-16-imi pisussaaffini sumiginnarpagit akuersissut Naalakkersuisut nammineq suliniuteqarnerisigut atorunnaarsinneqarsinnaavoq. Atorunnaarsitsinnginnermi Katersugaasiveqarnermut Ataatsimiititaliamut oqaaseqaammik piniartoqaqqaassaaq.

Imm. 2. Akuersissut atorunnaarsinneqarpat katersugaasiviup sulinini unitsittariaqarparaa, pissutsilluunniit Naalakkersuisut aalajangersimasumik piffissaliussaasa iluanni aqqissallugit. Piffissaliussap aalajangiunneqannginnerani Katersugaasiveqarnermut Ataatsimiititaliaq tamanna pillugu oqaaseqaateqaqqaassaaq.

§ 18. Katersugaasivik sulinerminik unitsitsissappat katersugaasiviup katersugaataasa qanoq pineqarnissaat Nunatta Katersugaasiviata Allagaateqarfiatalu aalajangiivigissavaa.

Imm. 2. Katersugaasiviup akuersissutiminik arsaagaanini pissutigalugu unitsitsippat, imm. 1 malillugu ima aalajangiisoqassaaq katersugaasivik suliaminik unitsitsisoq akuersissummik arsaagaanermiit ukiut marluk qaangiutinnginneranni akuerisaaqqilluni periarfissaqassasoq katersugaatimik oqaasissaqarfigileqqinnissaanut.

Kapitali 4.

Katersugaasiveqarnermut Ataatsimiititaliaq

§ 19. Katersugaasiveqarnermut Ataatsimiititaliaq tallimanik ilaasortalik sinniisussalillu

Naalakkersuisut pilersissavaat, taakkunanngalu

- 1) ilaasortaq sinniisussaalu ataaseq Nunatta Katersugaasivianit Allagaateqarfianillu toqqagaassaaq,
- 2) ilaasortaq sinniisussaalu ataaseq katersugaasivinni akuerisaasuni pisortat akornanni Nunatsini Katersugaasiviit Kattuffiannit, NUKAKA-mit toqqagaassaaq,
- 3) ilaasortaq sinniisussaalu ataaseq katersugaasivinni akuerisaasuni siulersuisut akornanni Nunatsinni Katersugaasiviit Kattuffiannit, NUKAKA-mit toqqagaassaaq,
- 4) ilaasortaq sinniisussaalu ataaseq Kalaallit Nunaanni Kommunit Kattuffiannit KANUKOKA-mit toqqagaassaaq, aamma
- 5) ilaasortaq sinniisussaalu ataaseq Iisimatusarfimmit toqqagaassalluni.

Imm. 2. Katersugaasiveqarnermut Ataatsimiititaliami ilaasortat ukiuni marlunni atasussan-ngorlugit Naalakkersuisunit ivertinneqartassapput.

Imm. 3. Katersugaasiveqarnermut Ataatsimiititaliap siulittaasussani taassumalu tullissaa ilaasortami akornannit qinertassavai.

Imm. 4. Katersugaasiveqarnermut Ataatsimiititaliap suleriaasissani nammineq aalajangersartassavaa.

§ 20. Katersugaasiveqarnermut Ataatsimiititaliap allattoqarfeqartinnera Nunatta Katersugaasivianit Allagaateqarfianillu isumagineqassaaq, taanna aamma aalajangersimasumik allatseqartitsisuussalluni. Allattoqarfiup suliassanik ingerlatsinera Nunatta Katersugaasiviata Allagaateqarfiatalu sulineranit immikkoortisimaneqassaaq.

§ 21. Katersugaasiveqarnermut Ataatsimiititaliap suliassarai:

- 1) katersugaasivinnut nuna tamakkerlugu suleqatigiiffiussalluni,
- 2) suliassani katersugaasiveqarnermut tunngasuni Naalakkersuisut pisortallu oqartussat allat siunnersuisuuffigissallugit,
- 3) katersugaasiviit akuerineqarnissaat inassuteqaatigisassallugu, tak. § 13, aamma
- 4) katersugaasiviup akuerineqarnissamut piumasaqaatit eqqortikkunnaarai imaluunniit §§ 14-16 malillugit pisussaaffini sumiginnarai paasigunigut Naalakkersuisunut nalunaaruteqassalluni.

§ 22. Katersugaasiveqarnermut Ataatsimiititaliaq suliani pillugit ukiumoortumik nalunaarusiortassaaq, taannalu Naalakkersuisunut, Nunatta Katersugaasivianut Allagaateqarfianullu kiisalu katersugaasivinnut akuerisaasunut ilisimatitsissutitut nassiunneqartassaaq.

Kapitali 5.

Qangarsuarnitsanik innarlitsaaliineq

Nassaat

§ 23. Qangarsuarnitsat Kalaallit Nunaanni nassaarineqartut kimilluunniit uppersaasikkamik piginnittuuffiginiarneqarsinnaanngitsut piorsarsimassutsikkut oqaluttuarisaanermut immikkut pingaaruteqarunik Namminersornerullutik Oqartussanit pigineqassapput.

Imm. 2. Kinaluunniit qangarsuarnitsanik nassaartoq pigisaqalersorluunniit tamanna pillugu Nunatta Katersugaasivianut Allagaateqarfianullu imaluunniit katersugaasiviit akuerisaasut arlaannut pinasuartumik nalunaaruteqassaaq.

Imm. 3. Katersugaasivimmu akuerisaasumut taamatut nalunaaruteqartoqarpas § 15 malinneqassaaq.

Imm. 4. Nassaarineqartut piorsarsimassutsikkut oqaluttuarisaanermut pingaaruteqarnersut taakkulu qanoq toqqortarineqassanersut Nunatta Katersugaasivia Allagaateqarfialu aalajangiisassaaq.

§ 24. Taamatuttaaq imaatigut killeqarfiup iluani nassaat kimilluunniit piginnittuussutsimik uppernarsaasiivigineqarsinnaanngippata § 23 malinneqassaaq.

§ 25. Nassaat §§ 23-mi 24-milu pineqartunut ilaatinneqartut allannortinneqassanngillat/ akornuserneqassanngillat. Taamaattorli nassaat ajoquserneqariaannaappata aserorneqariaannaappataluunniit nassaartup nassaani toqqortarigallagassanngorlugit nassarsinnaavai.

Imm. 2. Nassaat isumannaarneqarnissaannut toqqortarineqarnerannullu pisariaqarsimasumut nassaartup aningaasartuutai naleqquttumik amerlassusillit Nunatta Katersugaasiviata Allagaateqarfialu taarserlugit akilissavai.

Imm. 3. Qaqtigoorluinnartunik piorsarsimassutsikkullu oqaluttuarisaanermut pingaaruteqarluinnartunik nassaartoqartillugu Nunatta Katersugaasiviata Allagaateqarfialu oqaaseqaateqareerneratigut nassaartoq Naalakkersuisunit akissarsitinneqarsinnaavoq.

§ 26. Naasunik uumasunilluunniit ujaranngorsimasunik ujaranngulersunilluunniit, imaluunniit nunap sananeqataanik ilisimatuussutsikkut soqutiginaateqarluinnartumik saqqummersissallugilluunniit soqutiginaateqartut Namminersornerullutik Oqartussanit pigineqarput.

Imm. 2. imm. 1 malillugu nassaaq nassaartumit Nunatta Katersugaasivianut Allagaateqarfianullu tunniunneqassaaq.

Imm. 3. Nunatta Katersugaasiviata Allagaateqarfialu aalajangissavaa, nassaap ilisimatuussutsikkut asseqannginnersoq imaluunniit saqqummersinneqarnissamut piukkunnaateqarnersoq nassaarlu qanoq paarineqassanersooq.

Imm. 4. Naalakkersuisut Nunatta Katersugaasiviata Allagaateqarfialu oqaaseqaateqareerneratigut nassaartoq akissarsitissinnaavaa.

Nassaat soqutiginaateqartut nalilerneqartartut

§ 27. Nassaat §§ 23-mi 24-milu pineqartunut ilaatinneqanngitsut, kalaallili piorsarsimassutsikkut oqaluttuarisaanerata ilaanik pingaaruteqartunik takussutissiisut Nunatta Katersugaasivianit Allagaateqarfianillu immikkut soqutiginaateqartut isigalugit nalilerneqarsinnaapput.

Imm. 2. Nasaanik soqutiginaateqartut nalilerneqarsimasunik piginnittup piginnittuussutsimut tunngasut toqqortarineqarfialu allannguuteqartinniarunigit tamanna Nunatta Katersugaasivianut Allagaateqarfianullu ilisimatitsissutigissavaa.

Imm. 3. Nassaat immikkut soqutiginaateqartut nalilerneqarsimasut tuniniarneqarpata taakku Namminersornerullutik Oqartussanut pisiarinerani akii malillugit neqeroortigineqaqqaassapput.

§ 28. Nassaat kalaallinit suliarineqarsimasut 1945-p siornaneersut, nassaallu § 27 tunngavigalugu immikkut soqutiginaateqartutut nalilernerqarsimasut Nunatta Katersugaasivia Allagaateqarfialu akuersiseqqaartinnagu nunanut allanut anninneqarsinnaanngillat.

Imm. 2. Nassaat nunanut allanut annisissallugit kissaatigineqartut pisoqaassusii nalornisoornartoqartillugit Nunatta Katersugaasivianit Allagaateqarfianillu paasiniarneqartassapput.

Imm. 3. Pisuni immikkut ittuni piffissami aalajangersimasumik sivisussusilikkami annissinermut akuersissutip atuunnissaa nalunaarutigineqarsinnaavoq.

§ 29. § 28, imm. 1 tunngavigalugu annissinissamut akuersissuteqartoqanngippat nassaat taakku sumiluunniit tuniniarneqarunik akigisinnaasaannik akilerlugit Namminersorerullutik Oqartussanit tiguneqarnissaat nasaanik taamaattunik piginnittup piumasarisinnaavaa.

Imm. 2. Sulianik ilisimasallit naliliisereerlugit, matumani Nunatta Katersugaasiviata Allagaateqarfialu oqaaseqaateqartinneqarnera ilanngullugu, akigitinneqartussa Naalakkersuisunit aalajangersarneqassaaq.

Kapitali 6.

Aningaasalersuineq tapiissuteqartarnerlu

§ 30. Nunatta Katersugaasiviata Allagaateqarfialu sulinera Landskarsimit tapiissutitigut, avataanit tapiissutitigut aamma kiffartuussinernik il.il. tunisaqartarnikkut aningaasalersorneqassaaq.

Imm. 2. Nunatta Katersugaasivianut Allagaateqarfianullu Landskarsip tapiissutigisartagai ukiumoortumik aningaasaliissutinut inatsisitigoortumik aalajangersarneqartassapput.

§ 31. Kommunit katersugaasivinnik akuerisaasunik ingerlatsisut ingerlatsinermulluunniit annertuumik tapiissuteqartartut ukiumoortumik aningaasaliissutinut inatsisitigoortumik ataatsimoortumik tapiissutit aqquutigalugit Landskarsimit tamatumunnga tapiissuteqarfigineqartassapput.

Kapitali 7.

Naammagittaalliuuteqartarneq pineqaatissiisinaanermullu aalajangersakkat

§ 32. § 23-mi imm. 4-p naggataa kiisalu § 28-mi imm. 1 tunngavigalugit Nunatta Katersugaasiviata Allagaateqarfialu aalajangiinerat sap. ak. sisamat qaangiutinnginneranni Naalakkersuisunut naammagittaalliuutigineqarsinnaapput. Naalakkersuisut inaarutaasumik aalajangiin-nginneranni Katersugaasiveqarnermut Ataatsimiititaliaq oqaaseqaateqartinneqartassaaq.

§ 33. §§ 23 imm. 2-mik, 24-mik, 26 imm. 1-imik 2-millu, 27 imm. 2-mik aamma 28 imm. 1-imik unioqqutitsinerit akiliisitsinermik pineqaatissiissutigineqarsinnaapput.

Kapitali 8.

Atortuulersitsineq ikaarsaariarnermilu aalajangersakkat

§ 34. Inatsisartut peqqussutaat manna januaarip aallaqqaataani 1999-imi atortuulersinneqarpoq. Taamaattorli § 31-imi aalajangersagaq 1. januar 2000-imi aatsaat atortuulersinneqarpoq.

Imm. 2. Tamatumunnga peqatigitillugu katersugaasiveqarnermut allagaateqarfeqarnermullu Namminersornerullutik Oqartussat nalunaarutaanni nr. 4-imi maajip 18-iani 1990-imeersumi katersugaasiveqarnermut aalajangersakkat atorunnaarsinneqarput, taamaattoq kapitali 12-imi aalajangersakkat aatsaat decembarip 31-iani 1999-imi atuutilersumik atorunnaarsinneqassapput.

§ 35. Katersugaasiviit Inatsisartut katersugaasiveqarneq toqqorsiveqarnerlu pillugit peq-qussutaat nr. 4 maajip 18-iani 1990-imeersaq siusinnerusukkulluunniit inatsisaasimasut tunngavigalugit akuerineqarsimasut aggustip aallaqqaataani 1999 nallertinnagu kapitali 3-imi aalajangersakkat tunngavigalugit akuerineqareersimassapput.

§ 36. Katersugaaveqarnermut Ataatsimiititaliaq, tak. § 19, januaarip aallaqqaataani 1999-imi siullermeerutaasumik pilersinneqassaaq.

Namminersornerullutik Oqartussat, ulloq 30. oktober 1998.

Jonathan Motzfeldt

/

Konrad Steenholdt